



敬菴遺稿 二

祭文  
告文  
祈雨文  
行錄  
附錄

16  
1203  
2止

二





門 16  
第 1203  
卷 25



敬菴遺稿卷之三目錄

祭文

祭三從伯兄判書公 齊憲文

祭亡妹遷葬文

祭亡室遷葬文

祭洪任實 淳一文

祭再從叔母貞敬夫人林川趙氏文

祭外從兄判書俞公 致善文

祭沈教官 暢之墓文

祭亡側室安義金氏文



祭尹平山 永夏文

祭李咸平 用一文

祭外姑孺人清州韓氏文

告文

別厲祭告文 任全州時

首陽山城南門開基告文 任海州時

祈雨文

社稷祈雨文 任江西時

舞鶴山祈雨文

金剛井祈雨文

社稷祈雨文 任載寧時

槎橋祈雨文

行錄

先考順興府使府君言行錄

先妣淑人杞溪俞氏行錄



敬菴遺稿卷之三目錄

敬菴遺稿卷之三

祭文

祭三從伯兄判書公 齊憲文

維歲次癸亥八月乙亥朔初九日癸未三從兄判書  
 公考終于駱洞本第之正寢越一朔九月乙巳朔十  
 六日庚申三從弟齊近慟德儀之永闕悼此生之益  
 孤謹具薄奠操文告哀于靈筵曰嗚呼公之於家國  
 譬如百年古樹根固蔭厚而蔚然挺拔之幹上拂雲  
 霄下庇品彙者也竟因光陰催之風霜侵之塵閱五  
 十六期而天年告終 宸情震悼同朝驚痛親屬無





托下至於門生故吏皂隸奴僕莫不齋咨於悒如哭其私公何以得此於此世也嗚呼公儀容端凝德望隆重傳世忠而孝宅心仁而厚自其未顯人皆期之以支廈之棟樑瑞世之麟鳳及登龍門平步雲衢內外華顯歷敷殆盡皆公所宜素有非如僥倖之人得志夸耀於一時者也然而位不得稱德年未得食報經綸抱負又未克盡展則後生之痛曷有其極嗚呼公之同氣凡三人而仲兄不幸早世公與季兄友愛尤篤常以季兄之早衰爲深慮每相對憂形於色矣何忍使俄忽之頃遽當割半沉慟耶噫弟之於公以

親則功總以情則無異形氣分連也凡憂患疾苦大小事務於公焉告於公焉議終始仰望依賴於公公亦有事必訪弟而今焉已矣痛哭何及以公之天資敦厚心德仁純尙不得期頤之享弟於此亦不能無憾於天理也所可慰者玉樹在庭尙克傳家平泉之樹石于公之門閭其將有屬而蕃後公其鑑念於冥冥之中也否嗚呼弟適縻郡紱公沒而雖不得臨訣間得由歸公葬而方竊擬攀紼俯仰疇昔有淚無從茲具醴果庸伸微誠靈若有知庶幾顧歆

祭亡妹遷葬文



維歲次甲子十一月戊戌朔初七日甲辰亡妹金氏  
婦之柩改葬于長湍新阡兄通訓大夫行江西縣令  
齊近時縻邑務不得往會忍哀以過越翌年乙丑二  
月丁卯朔初十日丙子還任之路爲文數行畧具酒  
果歷視而陳于墓前以告悲臆曰嗚呼吾妹喪已六  
歲臨湍之原旌翼深瘞墓草已宿音容長逝喟然西  
望有淚濕袂余得爲邑老少食肉莫偕同氣思輒痛  
盡君子鬢玉從夫顯榮兩女出嫁次第成長東床迎  
婿箇箇俊秀喜氣盈溢孰不慰賀汝獨不見徒增余  
悲乃遷宅兆玄和出世恍若起汝歸寧舊第庶慰慈

心疚憾之際庶乎相見三女二婿官事少暇歸期暫  
滯來不見汝號痛噫噓儀形冥昧余悵尤倍何慰吾  
慈更無兄弟賢乎吾妹無愧女史舅姑夫子悼其溫  
惠復歸長夜千古永閔體魄始安地理叶筮舅家先  
塋卽其舊山未滿一舍妹必欣然撫柩臨壙亦旣違  
意情缺禮虧適緣事勢薄饌蕪辭今始奠告欲哭過  
時徒自躑躅瞻望隕心哀淚盈掬靈如有知庶幾來  
格

祭亡室遷葬文

維歲乙丑十一月壬戌朔十一日壬申亡室淑人韓



山李氏之柩改葬于龍仁棲鳳洞新阡夫潘南朴齊近爲文數行用其前五日丙寅因上食讀告于五馬洞舊山下靈筵畧泄悲臆曰凡人出嫁皆願偕老淑人之意亦不異他辛酉何歲家運屯否无妄之祟竟嗇其壽天年太促四旬有餘仁厚之德幽貞之姿見者必稱實鮮其儔容貌聲音霧月依稀幽明永隔居然五歲逝者如斯星霜屢周余蒙 國恩西州佩符奉老就養粗伸私情雙轎榮行莫偕糟糠廩况稍厚家人食肉觸處增悲何忍忘却憶昔勢窘事多難言奉祀供賓專責淑人黽勉拮据不至艱乏有齊季女

庶幾詩什浚剝空無受困斯極體膚凍餒猶屬餘事丈夫計拙寧不慚痛雖有官祿何心獨享鰥苦最難叵耐踴涼之仁之德宜報不食定兒小成賀者絡繹皆曰是慶乃母善蔭不見其喜益愴余心蕃衍熾昌庶卜其後今夏屆秋惡境是何一亦疚傷况乎荐酷載嬉載抱如夢未覺言之傷盡難堪者理靈若有知必也悒悽淑人何辜由余過積長抱撫愛淑人在世泉臺陪歡想如前日今日謀遷諒由夙運堪輿渺茫果難盡信舊疑非地其新吉云縱離先塋一舍不遠神理允叶靈必樂就柩見白日復出玄和靈其再生



且欣且喜兒泣呼孃漠無回語以若慈愛胡寧忍斯  
豈真再生復歸長夜一聲號慟哀淚如瀉知耶否耶  
嗚呼哀哉尙饗

祭洪任實 淳一文

維歲在辛巳六月辛卯朔三十日庚申南陽洪公卒  
于任實任所旅櫬將返于京以七月辛酉朔二十一  
日辛巳行過府西其友人遽全州通判朴齊近畧具  
菲薄之奠操文哭訣曰嗚呼簡重剛直惟公之操清  
雅端嚴惟公之貌昔我與公早歲托契追逐漢師載  
言載笑夙抱才器將鳴于世世事蹉跎末路蔭仕屢

典郡邑蔚有聲譽街兒迎竹州老奉薤適我薄宦佩  
符西縣公承分憂美赴比隣世故多閱人事累變我  
莅茲土公又南遷梗轉偶合萍逢奇緣白首開懷儘  
是兩翁誼在共濟庶幾心同所慰任民賢侯幸逢曩  
接清範共討媿媿衰顏相對舉酒盈卮奈何中年二  
豎爲戲武城絃歌清健無期向承華函店氣闖肆老  
境例證我不深慮豈意今朝訃車忽至天乎鬼乎公  
其云亡千里客館胡至此境一聲嘯唏有淚滂滂火  
焚蘭原蕙草自傷證是无妄逝豈斯長棘嗣攀擗哀  
極穹壤孀閨慟盡冤切崩城令愛已笄遽見逾理嬌



客出宰幸得近治邑事多碍未奔公歛公若有知曷  
不悵甚愷悌之儀不可復覲鄭重之論今焉永隔嗚  
呼如公更對何域舉目穹窿雲霓蒼蒼回首泉臺道  
路茫茫人生七十從古所稀六旬二歲何其倏爾仁  
未得壽天道難諶靈輻來停斜日驛店樸馬雨濕桂  
旂風慘物物觸目處處傷心曩則笑迎今以哭送浮  
生離合等是春夢我腸非鐵其能可耐我心非石寧  
不可哀公如有靈庶歆茲盃吁噫悲夫嗚呼哀哉尙  
饗

祭再從叔母貞敬夫人林川趙氏文

維歲次丁卯七月壬子朔二十七日戊寅卽我再從  
叔母貞敬夫人林川趙氏小常之日也再從姪齊近  
愴懿範之永闕慟德音之莫追用前八日庚午謹具  
菲薄之奠爲文哭告于靈筵曰嗚呼哀哉箕師敘福  
壽康考終三者皆備命運曰通於吾親見再從叔母  
安享期頤渥顏黃耆親戚隣里老少婢僕各得其懽  
心悅誠服閨範壺則懿行淑德考諸古史亦未多覲  
聖世乘化如寐得醒滿屋籌添大海波澄姬聖有訓  
配命多福以吾親炙此理胡忒淚盡童烏慟切子夏  
逾理何酷終鮮膝下繼孫纔冠不幸先折克家一嗣



嗟又單子意者斯際天其未定苟定于一福善猶彰  
穀似之會庶期昌大執契以證祿其未艾始覺乘除  
毫釐不差靈如有知少慰于茲小子受眷無間親姪  
嘖笑欣懌教誨如一顧我恤我恩同劬勞仰之如母  
趨拜夕朝自忝朱墨路隔京鄉起居承顏曠不如常  
尚冀德慶益躋于遐云胡无妄遽捐吾家區區私痛  
幽明難叩以若情地緣碍職守病未候問殯未躬將  
襄未趨訣奠未趨遑今者之來促還有命不敢言  
私虛廓如新痛悼倍只悲從中來有淚漣洏酒果薄  
陳庸告衷曲不昧有臨庶幾歆格嗚呼痛哉尚饗

祭外從兄判書俞公

致善文

近古判書俞公以甲戌七月初三日正終于嶺南之  
營衙流景迅駛居然常事已屆外從弟朴齊近痛德  
儀之永閔悼此生之益孤用其前十二日六月丙寅  
朔二十一日丙戌謹具薄奠敢綴蕪辭哭告于靈筵  
曰蹟公先懿顯顯亦世慈教之門忠簡之裔公繩厥  
武惕若自勵國而忠貞家而孝悌自蔭而科躬逢  
盛際滿亦不溢確有秉諦王曰嘉乃外內著勸爰  
授之卿匪專能藝若將大試眷顧靡替乍按畿臬旣  
嚴且惠民安其堵夜戶不閉時有洋警舉世危厲公



獨不懾山嶽之勢戟門畫靜簿牘無滯壹於是非以  
義斷制真良刺史人莫公逮余信勁質籌永海屋云  
胡踰甲遽奪之速往在按嶺千里牙纛方面之托敷  
心之囑庶幾南土百姓有祿憐矣客館賀者旋哭不  
副 明命魂兮踏踈嗟余生晚外無舅叔唯公為兄  
認戚如族眷我恤我視同手足憂喜以之互說心曲  
萬事今已蕭瑟寒竹樂樂螟嗣優哉式穀俾爾熾昌  
用寓蘄祝典型何覲片月荒麓單學之訴有淚盈掬  
嗚呼哀哉尚饗

祭沈教官 暢之 墓文

維歲次乙亥九月甲午朔二十八日辛酉通訓大夫  
行江華府判官朴齊近敢昭告于故教官沈公之墓  
昔我童年公來館我善誘循循牖我昏惰誨既不倦  
養亦以正豈惟我惠是公之行矯矯風節燦燦文章  
今世難得昔賢可方星星鬢髮幾勞灞渡河汾教授  
若將衢步又不能年五五而止善人不祿難謀者理  
沁水之濱寔公攸居徐孺風聲鄭公鄉閭適我薄宦  
縮紱是邦公如在者當先飛韉升堂請益必有諄諄  
以及從政亦可書紳噫其已矣于何訪躅瞻彼斧堂  
山空草宿觴酒豆肉豈日展忱公靈不昧庶幾來歆



尚饗

祭亡側室安義金氏文

汝寧棄我我忍捨汝青山埋奩長公寃語白屋無眠  
詩老悲淚於古人觀矧爲吾地往在中年斷絃腹悲  
靜夜孤燈悼亡有詩幸有禱桃謂曰小妻凡百家務  
惟汝是提萱闈篤耄恒在靜攝左右扶將賴汝躬執  
老少戚黨汝能親愛瘦婢羸僕汝能勞徠顧余衰謝  
待汝以安食之飲之適意尤難動必以時如佩之環  
伶慧姿質言辭其間自江而載兩邑隨往無幹外事  
乃志可尚宜外宜內性順且良動靜周旋期我平生

出宰沁府留汝在家解婉添丁旋患無何滯務纔訖  
促鞭歸視竟違面訣不待我至雲飛雨絕遽成邃古  
懇懇汝心多其未報泉臺含恨若爲汝情我獨負汝  
石面猶駢淒月滿庭長號一聲齒豁頭童憫余之衰  
汝年尚綺胡此總帷悠悠天地去將疇依回念誰昔  
十六年已於汝身分都是苦海上下承接肝肚成罍  
前後毒憾鬢髮幾禿今一血塊寄汝面目差待長成  
庶如見爾吾病且老亦難必矣殮殯已過汝果永歸  
歸是無情嗚呼噓唏菲奠蕪辭聊以說懷汝其有知  
庶顧茲卮尚饗



祭尹平山 永夏文

古語有云生寄死歸死固常也無足爲悲於公絕悲  
行路堪涕古家名武苑爾著譽爲 國干城世所推  
詡七典州相五蒙 璽褒到處茂績有口成碑孰不  
欽誦遠塗是期豈意客館奄然長逝箕範五福壽居  
其一未免於天何遽短折萱堂鶴髮孀閨糟糠望絕  
倚閭慟深崩城鴿原湛樂孔懷貽憾二蘭并秀晨夕  
侍列奈此離闈竟失終孝戴星奔趨穹壤冤呼情界  
如許聞者短氣公性倜儻公操廉介處官如家推此  
爲治余無夙契宰隣始知一面如舊洞許心曲境聯

一舍有疑輒質曩按邑獄駕言來覆返旆有日忽聞  
患報飛牘走探莫省回寄意謂无妄遄復天和凶音  
踵至心神飛越促徒往哭幽明永隔知音者稀從此  
斷琴仁未得壽天理難諶丹旆秋風景色淒涼嗟向  
佳城歷出此境書未盡意有淚滂沱靈如有知庶歆  
茲卮嗚呼哀哉尙饗

祭李咸平 用一文

我聞古人重厚者壽惟公沉毅確乎有守憶昔盍簪  
粵自弱冠并載比隣拭青相看匪直詞學夙抱才器  
將大鳴世運屯竟躓末路蔭仕非公所期薄施峽治



十年棲遲嶺雲洛樹望裏結戀世故多閱人事屢變  
復官太僕始還漢師白首開懷儘是兩衰我在西縣  
公赴錦上湖海落落曷不怙悵所慰錦民幸逢賢侯  
歉後仁政得免填溝繫我南來公適同省萍水奇緣  
矧乎暮境曩擊華函方腫闖肆那知一朝訃車遽至  
琴軒一晤奄成終古我驚推枕有淚如雨症是无妄  
逝豈斯亟傍侍無人有誰易簀想公器宇公壽可久  
孰謂福善而不貽者天理舛錯有莫究因我非達觀  
寧不愴神悲公身後笑彼螟嗣呱呱兩嬌未嫁維季  
我縻職事奔未及歛靈輻來停斜日驛店來時皂蓋

去路丹旌日月幾何觸目傷情凝重之儀不可復覲  
高亢之論今焉永隔缺界人生離合如夢春旣欣握  
秋以哭送顧余衰腸其能可堪文荒酒薄靈其有歆  
尚饗

祭外姑孺人清州韓氏文

邈彼穹蒼畀善嗇釐撫理難謔氣數之奇嗚呼女士  
有德有儀無違悅訓睦嫺咸宜刻苦清寒不顯色辭  
呱呱覆巢庭有雙兒視以已產撫克其慈教有義方  
婚嫁以時中身晝哭家事益悲殫竭持門厲顏忍飢  
一綫碩果惟有鞶絲擇婿折桂樂康可期嗟此蘭焚



舊淚新滋孝哉長胤出奉宗祠來省生闡服勤愉怡  
承訓補蔭南紱北麾就養專城始豐肉糜甘旨忘味  
話舊輒噫宦路易躡版輿何遲歸洛澹泊歡悅永貽  
過房有嗣端性秀姿方期遠器斯也有斯懷抱孤幼  
涕零交頤險釁荐酷溘欲無知積疚彌崇景沉掩嗟  
過稀窮命若減壽眉余忝館甥久承眷私自失脾合  
采切戀思守官南州計車忽馳遠未訣面怛焉悽其  
春闈郊阡將戒靈輻衷素瀉淚庸薦茲卮嗚呼哀哉  
尚饗

告文

別厲祭告文

任全州時

伏以四時之運皆有常度和則致祥乖或致異顧今  
惟崇云胡肆毒四朔長潦沴氣所畜罹輒吐瀉死亡  
相續自府暨村有浮癘疫如卉其蔓如水其沸迅風  
烈火勢急燎原童穉老大朝人夕鬼哭聲干霄愁日  
慘愴秦瘠漢瘠莫此爲甚結陰爲妖何冤何憾判官  
失職逢神之怒咎將誰任罰所不辭民則無辜曷云  
不悲靜言思惟悚蹙靡措蓋聞古語神人相依人若  
盡死神將疇歸要活民命冀蒙神恤殿宇灑掃壇壝  
淨肅別卜吉日用告城北召集羣靈醉飽飲食驅除



乖症廓清全境伊誰之賜惠澤歌詠雲散雨霽和溢  
天壤謹以牲幣醴齊粢盛庶品式陳明薦尚饗

首陽山城南門開基告文

任海州時

伏以石城天塹咸仰設險保障之威山譙年深復舉  
涓吉修繕之禮斯董不日之役以安在地之神泰磐  
奠基豫析禦暴伏惟山之神靈祐我東土睠茲南方  
雉堞環山果是魏國之寶也魚鑰縈石豈敢楚人之  
寇焉星北拱於望華地東傾於飛瀑伏願開基之後  
休徵盼蟹景福紆餘木竿呵禁勿使興妖而作恠金  
湯鞏固克享悠久而盛長謹以珪幣香樽式陳明薦

尚饗

祈雨文

社稷祈雨文

任江西時

維社稷神司厥土穀烝民乃粒伊神之力於赫斯臨  
眷佑一境胡茲極無彌月亢陽晝以淒風露乾于夕  
夏至已過愈見杲日三農其愆一雨終惜視彼龜坼  
念此魚喁神胡忍斯不恤黎氓麥已告歉禾又將無  
井泉涸渴苗穗萎枯靡遺之憂迫在朝暮顧余匪才  
忝居守宰瘼厥之咎實有所歸民生何辜心焉如灼  
齋誠致虔未暇卜日敬薦醴幣敢冀冥隲神道孔仁



庶幾感格及今一霈蘇枯潤涸轉灾爲祥恭俟神恤

舞鶴山祈雨文

州鎮居坎位叶水德鶴鳴九臯其靈惟嶽雲蒸雨施  
穀稔歲穰水旱有禱捷厥靈應羣黎賴活咸被神澤  
今茲亢旱胡爲斯酷四野焦坼百穀枯萎無麥無禾  
民將盡劉雲漢告警豈宜 聖世咎在長吏致此災  
沴齋誠致虔于社于稷豈圖冥冥尙遲孚格宜罰余  
躬百姓何辜其將溝壑中澤鴻磬念茲憂惕心焉如  
灼潔我粢盛罔不祇肅神其鑑茲庶垂冥隲不見其  
動澤自及物亟霈甘澍興發痒稼怵惕屏息恭俟神

休

金剛井祈雨文

維井有神夙著靈應潤物澤民汲引其功水旱有禱  
捷如影響萬類咸育百穀豐登胡茲一旱太甚數月  
日望雲霓寸霏不滴四野盡焦三農愆期如焚如燄  
無麥無禾淒風烈日災沴非常魃旣肆虐嗷嗷生靈  
惟靈孔昭何不恤顧抑人事錯致神之怒吏實不職  
民則無辜先禱方社暨于主嶽尙遲冥眷聽余漠漠  
瞻言雲漢寔誠淺薄反躬怵惕彌增悚慙神道至仁  
冀垂陰隲亟賜一霈夫蘇枯涸感應有理謹薦洞酌



社稷祈雨文

任載寧時

有赫明靈司厥土穀曰雨曰暘維稼維穡時和年豐  
莫非神澤有禱水旱其應斯捷奈此秧節一旱斯酷  
風淒以朝露乾于夕原濕盡焦川澤俱涸望望雲霓  
杲杲炎日喁喁烝黎如鮒在轍民生何辜吏實不職  
猥忝字牧癯曠斯極念茲戰兢心焉如灼走告于神  
未暇其卜齋誠致虔敢冀冥隲亟賜甘注以膏以沃  
怵惕屏息恭俟神恤

槎橋祈雨文

常暘爲災今已幾月節過夏至寸霏不滴云胡此時

旱魃肆威四野盡焦三農愆期麥先告歉黍又隨萎  
民不粒食其將盡劉絜神孔仁寧不哀矜回斡玄樞  
當在俄頃災不虛生惟人所召顧余不才忝宰百里  
無一善政有百可尤念茲兢惕民實無罪吁嗟之祈  
今且至三忱誠淺薄尙遲孚感淒風長吹杲日愈烈  
齋誠走告聽予漠漠睠言靈湫如濁思涓神如不惠  
亦何賴焉清醑剛鬣旣膾且馨神其格思式遘冥應  
亟惠甘露痒稼興勃解我民困晷刻是急

行錄

先考順興府使府君言行錄



府君天稟明粹器宇端雅心事弘毅望之儼然可畏  
卽之溫然可親

府君顏貌清羸肌膚皎潔眉秀而毛細眼濶而眸明  
神彩射人額豐而圓耳高過目鼻長而直口方而端  
鬚髮紫潔而疎潤

府君秉志廉介飭已謹嚴動靜云爲律以規矩接待  
推施體以仁恕無點毫瑣陋與忤克

府君寢食不言語坐立不倚踞視聽必正喜怒必常  
讀書不撓肩背雖蒼黃憤迫中未嘗有疾言遽色

府君篤於持敬不以幽獨而少懈平居拱手端坐如

山峙壁立暑熱不解衣疾病不去襪遠方人客之來  
毋論親疎卑幼必起迎禮貌之

府君性沉重誠信常時寡言笑其於人也慈諒懇摯  
披瀝心腹未或失次序亦於所當言之外不妄費一  
辭不設畦畛見者莫不欽服

府君臨事已諒其處置亦須務以周密雖日用微細  
必屢回裁度母或少忽真知合理則勇於力行非人  
沮遏所能撓屈

府君恬約自持謹拙自守富貴不能起其慕貧困不  
能易其操取予以義愛憎以道自夫修身克家至於



立朝爲官準以繩尺未嘗變渝

府君以 正宗大王丁巳十二月十八日巳時生于漢師貞洞第

府君晬辰卽立春節日也王考近齋先生取獻發之義命小字先是母夫人金氏夢有白髮翁遺一大塊石雄黃其色照明自此有娠而生

府君生而形貌秀異神氣滢澈從祖忠獻公在 禁直題送初度詩曰卜爾龜鶴壽振我詩禮門其期望甚重

府君兒時知覺屹如巨人遇飢者而欲食之寒者而欲衣之惻隱之心溢於辭表雖羣居嬉遊居止雍容無所煩雜

府君文藝夙就才思穎悟八歲始學書至十五六歲已盡讀經史一聞文義輒領畧如淑慝之別公私之辨不待長者教授莫不瞭然自解

府君年未髻動容周旋儼若成人十一歲時從祖父錦石公捐背成服日往吊殯所能哭拜如禮哀憾甚備長者異之

十四歲庚午將行冠禮王考以爲古禮必三加請東圃李公廷仁爲賓而行之是歲娶杞溪俞氏



府君成婚後陪先考入 闕私覲于 慈宮慈宮卽  
綏嬪於府君爲五寸親時 上方御春塘臺 慈宮  
御臺後便室 上自外入指府君曰是某也府君起  
立俯伏母敢舉顏遊目克盡尊敬之禮

府君自少謹飭我王考府君歷四邑三邑則皆往侍  
而靜處子舍無干邑事晨昏之外罕出房闈雖盃酒  
斤肉之微不擅用官人皆憚服焉

府君曰吾十六歲選馬史最好者幾傳讀之或侵夜  
不撤至今需用得力甚多云

府君聰明絕倫閱耳目者不遺忘嘗於少日爲觀別

科誦尙書一遍仍爲拋却至中年猶記得幾篇時或  
諷誦使不肖聽而受之無一字遺錯

府君之歷試州郡也報牒訟題無不辭簡而意盡及  
夫殺獄跋辭尤爲致意曰人命生死關係甚重官吏  
老鍊者見而驚曰此明府會工於吏文乎蓋謂其詳  
審鍊熟也

府君早登仕路常以不能力學自謙然奉公之暇猶  
以書籍自娛

府君筆法古真嘗曰吾臨王右軍帖故不能如時俗  
妍態又曰吾每在外邑事煩心馳自不得正寫汝輩



慎勿法之

府君事父母盡其孝敬每早朝必盥櫛正衣冠先適寢所問安否然後退見他事皇考常抱貞疾寧日絕稀府君左右扶護藥餌之用粥飲之節必躬親管檢洞屬憂慮之意溢於辭色

乙亥二月祖考捐世于瑞典任所府君時值弱年且四顧無親襲歛之節獨自盡禮既殯而官簿之未治者舉皆釐勘悉如祖考遺意雖禍變中其從容中規類如此

前祖妣李淑人墓在楊州祝石嶺先兆而以窀穸之

不利遷祔于烽火峴祖考府君新塋

府君哀毀甚至是年秋竟罹重疾至五朔而幾滅性居喪執禮甚嚴入內不踰中閫雖盛暑罕脫衰絰朝晡餽哭之甚哀每遇喪餘必行素終日不啓齒行祭哀號如始喪凡臨祭深居致齋將祭之夜不解衣帶將事之際誠禮俱至饌物則務致蠲潔曰人子追養惟在誠格二字物之豐約固當稱其有無吾見世人家力不逮者四處取貸苟且盛備是欲以享先而反爲辱先大矣

每當祭祀自致齋日至當日不授小兒課業不肖嘗



於齋日偶爾讀書府君責曰忌者銜恤茹哀而不及  
他事之謂也豈有當祭而讀書者乎方夏習功令憂  
其一日或曠至於忌日切不許之

府君之應舉也不以得失為憂惟盡其道而已庚辰  
秋 王世子行嘉禮稱慶設科分三所取三百人場  
規雜亂有勢力者爭赴主試親知之所而叅榜焉府  
君亦有攀援之機會而不隨俗習避其奔競或勸其  
勿失此時府君曰為士子寧可以關節應舉乎竟未  
獲時人服其操介

壬午臘月因 綏嬪喪差宗戚執事遂付司勇

癸未三月 顯思宮卒哭後有別單書入之 教宗

戚執事咸被 寵賚府君除 泰陵叅奉以風樹之

感終日飲泣

為寢郎數歲勤供職業 陵屬多有闕額府君搜括

充填守護無弊村樵之潛竊樹木必親巡痛禁之尤

謹於廉防時人居齋直多減饍捧價而府君不為曰

非士夫事也

甲申十二月 顯思宮過大祥後府君蒙 賞典陞

六品付司果

乙酉七月李台義甲為銓長末擬府君於引儀同日



又副擬水庫別提受 點

十二月除掌樂院主簿故例逐朔二六日肄習樂法  
府君考定其優劣簾具之弊敗者必稟提舉俾得改  
完同月移除敦寧府判官以無敦寧議呈旬

丙戌除 景慕宮令

六月除禮山縣監因承 傳尋換文化縣令

府君處官如處家愛民如愛子梅山洪丈嘗貽書稱  
府君表德而言之曰如吾某也滿腔都是惻隱黽勉  
仁術推行不忍人之政則隨感而應罔有不濟府君  
曰可作箴警

府君和易近民務察隱瘼每臨之假以色辭使得畢  
陳所懷雖微細事有害於民者切不爲之軍布之流  
亡疊徵者按帳籍而逐戶考閱均敷應役糴穀之欠  
逋貽弊者從方便而立本充完推及實惠民大悅歌  
頌不已

客館頽圯前倅每以役鉅而置之府君鳩財修葺至  
屢月始克告訖按使趙台晉和褒於殿最曰邑隨靡  
完真據實語也其餘軍器官物之朽鈍弊敗者舉皆  
繕利而補完

縣有兩井名曰文武年久廢滌邑人傳言若疏鑿則



出科第云府君爲文祭神而費財濬滌其後果出進士及武科亦可謂神驗而府君於爲民之道靡不用極如此

府君察事明敏方聽訟也不待多言已辨其曲直少無礙滯若幻迷官聽非理好訟者洞見肺肝必嚴治之使自懲戢是以治聲遠播如道內疑獄屢以叅覆官往赴皆得以公平處決兩無冤屈凡係公財奸吏之所隱匿偷弄者摘發如神時稱神明太守府君再從弟牧使公爲隣郡守上書曰兄主詳明治法綜核手段見者以爲至親間善評也云

凡吏民有罪者雖加箠罰而必以欽恤之意先之審其所犯之輕重故眚然後治之亦未嘗濫加刑杖曰國法不可違也雖被罪者皆懷其惠而憚其威

府君莅政也路碑成林府君若有見聞則必拔入曰吾無治績徒得虛譽反爲不祥蓋執謙挹之意及其遞歸吏民立去思碑人皆謂前日貶題甚爲爽實

縣之九月山素稱名勝府君聽理之暇與邑中文士數三人遊訪徜徉唵嘯於礪溪邱壑之間若將忘返又往覽長淵之金沙諸寺賞海棠花得詩十餘篇初府君之再從弟作信川倅戚再從兄李公鼎臣作載



寧倅邑之相距朝發午至每乘暇源源如在京第湛樂洽好至是皆聯轡親知三四人亦從之真可謂盛遊也

府君莅郡數載雅向文治月出旬題勸課鄉士優等者必加厚賞於是文風稍振一宰相貽書比之於文翁儒化蓋因邑名贊美之說而誠得的當

己丑十二月銓長金台鏘末擬府君於丹陽郡守同月又末擬於加平郡守受 點

加平地處畿輔峽俗愚悍健訟府君剛明爲治濟以仁惠俗習頓變巡使李台義準褒曰慈良愷悌政如

其人又曰威行於廉

有士夫武斷鄉曲者則常痛抑而使知畏懲然或小民之凌侮士夫者則亦必猛治曰名分不可不嚴也班名見稱者以不受還穀看作技能害歸於小民爲弊莫甚府君旣之官不拘尊卑逐戶均分班戶自以謂古無是例百計圖免請囑紛紜府君以爲食土之民一也 國家法意豈有厚薄牢拒不聽由是賦役均平

夏大旱因 朝令祈雩府君齋潔虔誠爲文遍禱于山川邱瀆果有靈驗



府君爲政實效尤著賑濟是歲大饑冬設公賑殫竭心力拯求方策公穀之不敷者捐廩而補之民所賴活不可勝計給糧則必察其精麤屢致簸揚分粥則必監其稀饗務均多少下屬亦感而不敢欺嘗分粥於饑民也親巡其間民有牽府君裾曰吾明府庶幾無疾病歟府君莞爾而徐却之不以損體而加罪又有採得山菜一掬願供厨具者民莫不感歎曰持此兩事可以知平日和易撫恤仁惠浹洽愛好無已矣

癸巳五月除居昌府使

府以嶺外一都護事務叢集又經荐歉痼瘼轉深府

君莅之以勤恤綜明如場市日及他有事訟獄踏至文簿堆積府君左右酬接剖決如流往往有不遑寢食而無倦疲色赴任之冬因歲惡設賑親抄飢戶虛實不蒙蠲割廩俸少無顧惜之意汲汲救濟民無捐瘠之憂邑人致書曰一邑生靈有一分未死之心者曰吾有仁政太守而憐我恤我庶免轉壑之患云府君爲官廉直無絲毫肥己之事府有官需米不啻屢百包而例以高價執錢時值歉荒市直高踴每包價幾近二十緡隣郡一是準捧府君獨以輕價曰爲字牧者豈可趨利乎



乙未春因 促教遞任蓋昨年冬趙台秉鉉拜道伯  
其大人曾有疏駁府君從仲叔父叅贊公事措語極  
涉誣毀揆以公法雖非應避之嫌而府君決歸或有  
言其過當府君答之曰吾家叔姪之間不可以五寸  
泛論且吾以早孤餘喘平日賴以依仰故如是

府君之莅此府未滿數歲聲蹟已著德惠均沾吏民  
之愛戴無比其爲治也有鄉士呈詩曰歲飢何處不  
呼庚幸使居民獨太平其臨行也曰經綸老手少年  
侯來暮謠成百里州治德非徒銘是口龜頭片石立  
千秋及賦歸咸惜其未留立碑頌之曰敷政寬平操

心清潔荒年樂歲民以寧壹

秋九月除順興府使前倅因公納愆滯譴罷之將差  
其代廟議謂以劇弊難其任李亞銓景在閱政案曰  
非此人莫可遂首擬

順興邑雖小而處在孔道痼瘼攸萃府君隨事殫誠  
惟思矯革無暫時休暇或朝盥而坐達曙不交睫怠  
弛之意不見于色人有言過惱神力府君曰吾欲盡  
分憂之道未能自己

此土風習甚惡好事鄉戰鄉稱新舊分黨助虐不畏  
刀劍爲弊甚大府君莅官之初痛加抑治其差任輪



環以代使之自息

府有臥丹獐洞面處在窮峽無物產而爲關東商賈往來之要衝故自前有設場市每月六日開市三次村氓賴以聊生凡係公納未有愆滯中因隣邑奉化五日之場市因其倅屢度相持竟以換其日期遠近商賈計日趨程者以期限移定來會違劃皆至狼狽以此破散漸至空墟民亦無賴以資生至如公納有不遑暇府君下車之後已察民冤廣詢物議指實報營使復舊規居民及商賈無不踴躍場市乃如故竹嶺通湖西爲嶺左之大路也峻險二十里長嶺嶺

下村落至殘每當公行若爲宿歇支持則無以支供具由報營俾免其弊民喜悅如卸重負賴以奠保京司公納萬餘金四年淹滯盡爲吏胥所奸犯其時存者限日備納使得宣力死亡而無指徵者屢稟巡營貸取五千金充備公貨該廳以遺物排年輪報不煩而收刷還穀久逋甚多府君盡心收捧餘數尙爲二萬六千餘包舉皆流亡虛錄府君以實報營請狀聞科律巡使金公道喜屢書苦挽曰道內七十一州無處不然首實者獨順興一邑何不循例磨勘也府君堅執不回或勸其從俗府君曰寧直實抵罪不敢



爲苟免之計以欺瞞 上聽巡使知其難撓竟聞  
朝前官皆論罪時倅置之亦異例也果自 朝家特  
蠲還逋民咸誦賢太守方其治歸也李台景在以書  
力挽曰如許弊弊之局如吾兄聰明恢刃不思展抱  
則其將無邑乃已雖千萬苦惱忍之又忍期於蘇瘼  
巡使金公書曰本邑事勢殆同膏肓苟非倉扁實難  
着手弟則別有期望之深切必欲與之共濟兄若棄  
去則順將無邑乃已

五月以親病辭遞遞任之後吏民如失所怙至欲呈  
籌司而願留立鐵碑頌之曰一心矯揉三政俱舉吏  
伏明威民飽慈惠且起閣以護俾傳壽久由是茂績  
尤著膾炙人口父老傳語曰爲邑未幾朔已立善政  
碑近世罕有又曰可知感孚於民者深蓋府君除是  
職爲九朔在官纔六七朔

季夏 上命六曹首亞堂及曾經道伯各別薦守令  
有聲績人以備調用蓋因趙領相寅永 筵白也前  
畿伯李台義準薦二人府君與沈碩奎也前海伯李  
台翊會薦三人府君與尹膺善任泰錫也二台與府  
君會經營邑間素所欽慕故皆以府君首薦焉

府君自號竹溪又曰德隱蓋寓意也有以竹溪刻置



圖章者常欲磨去仍詔不肖曰先考德義文章足以爲世儒宗未嘗有別號之見稱於平日吾以蔑如濫有作號此是少時事甚可追悔

持身雅拙靜居罕出雖舊日親知方處要津則不造其家常時來往者惟窮交貧族而已窺其門閭然無軒馬之迹入其室蕭然如寒士只有蒲團木椅之物所處房壁年久弊敗將改塗不付書畫曰吾見人家滿壁玲瓏非所艷慕

府君平生自奉甚約仕宦十七年屢典州郡而一副規模無所變改

每對食饌品稍豐則輒不悅下置幾牀曰家世清貧得免飢餓亦云幸矣豈忘其本分衣服則惟麤劣器用則惟完樸侈麗精巧終身不近屢典州邑未嘗殖聚貨利經理田宅

不肖嘗往至親家見有西洋自鳴樂爲其制作極精巧請借袖來府君見之嚴辭却還曰童騃好奇將焉用哉因舉玩物喪志之訓諄諄戒之

府君尤嚴於辭受人之餽遺揆之於義些有不安底意則輒却而不留

府君十九歲遭祖考喪偏侍祖母金夫人夫人性嚴



峻府君事之惟意承順未嘗違拂或怒加責罰亦恭受少無形於色此則不肖見而知者矣及府君之喪金夫人哭之慟曰溫清之節而誰爲之適痛癢之際而誰爲之撫吾失孝子將何依生是固至情之常而人謂有所誠格而然

處從祖兄弟如同氣友愛篤深非疾病及有事逐日往會湛樂和翕絕無睽貳之事於從祖伯兄判書公氣味趣尙尤相契合事無大小必仰議而後行判書公亦許以兄弟間知己雖微細事悉以諮諏嘗曰吾無從兄弟只有再從一人情誼不啻如四寸間公之

登第也緊置其赴場時所着儒巾或問其故公曰俗傳登科時所着儒巾他人着之亦好云吾有從祖弟卽宗孫也所重自別將以與之時府君纔十餘歲公之愛重蓋自少已然府君一日未候則必委訊曰得無疾病否旣候而將退則曰喫飯否須暫留而與我共食繾綣有難捨之意府君識解高明性分敏達判書公每詢及經傳之旨人物之評而如祖先德行家世文獻多從府君而探其詳府君無不辨難應對公輒怡然稱善

與吾母氏常對如賓每入內衣冠必飭



府君自失怙以後每當晬辰哀慕益切必拜家廟不肖癸巳十月行婚過醮於婦家而歸府君命之前涕泗滂沱蓋因孺慕之篤而如是

二代祖考文康公墓在陝川郡十三代祖妣居昌慎氏墓在三嘉縣府君爲宰居昌下車卽爲往省益置慎夫人墓田以補節祀之需買屋使守護人居焉嘗往叅先祖忌祀于至親家其家貧無以備祭需府君問知其由卽解佩刀與之曰此可以辦物使卽備行

吾再從仲祖父叅贊公以鶴臯公以下五世遺稿及

近齋先生文集以活字印行府君專管校正得無遺誤錯雜

嘗曰先世文稿雖有散見於諸書者不若全一統文字蒐輯以幾世爲題如五世遺稿之爲好又曰祖考文稿雖已刊行漏而未收者頗多且附錄者行錄及祭文全不鈔梓此爲欠缺若有事力則更刊全集爲宜

府君敦睦宗族雖疎屬卑幼極加厚待遇貧窮者必優恤之冠婚之過時喪祭之不逮輒有助給

府君凡八舉男女只有吾甥妹顧復撫育極爲止慈



然而小有過失切責不假

每慮不肖羸弱善病憂形於色藥餌之補調將之節暫不任置常舉戕性之訓目耳之誘諄諄戒之如課程量力勅督母或間撤不以恩愛而少弛勉勵之方曰人而不學是猶面墻將焉能入而修齊出而致澤乎且曰曠一日爲害甚多與其勇進而速退不若游藝而收效

御婢僕恩威兼行每有使令先量其力勞逸得均或有罪則未嘗輕加箠楚先責以事理使之自新府君待人一以忠信有言必踐有行必力亦未嘗苟

爲訾毀人之短處必掩護而務揚其善

凡唇舌之來不欲苟免皆順受而善處在我者曲則圖所以改自息其說在彼者雖不直亦無相校底意笑而不擬

府君與朋友交久而相敬雖親密間未或有諧謔語誠意真切亦未嘗苟飾邊幅

將赴順興任所也洪丈一純來會穩談後罷去相揖而別如任昌平翼常氏及洪丈一純氏與府君曾有先誼情愛兩至每到講磨談論亶亶不已嘗曰兩友操行清儉見聞博高多有人所難及處



梅山洪丈直弼自早歲師事近齋先生世好篤摯府君出入其門契誼非凡每往造終日相對論學質疑如歷代之邪正我國之忠逾靡不爛漫討去殆不知窓影向曛輒以酬酢間事回語不肖洪丈亦視以忘年嘗以書至曰足下天分近道步趨亦端無愧爲法家拂士其推詡如此

嘗曰吾見洪丈頗有粹盎底意年雖篤凡諸應接多有少壯之難及固知實地上立脚明德中得力後以祖考遺稿托其校正且請序文

府君歿後翌月洪丈爲文以祭日子之清揚洞徹表

裏曰有攸本丹穴其自冲齡稱家家道克遂敦孝崇禮門戶不墜乃所願言繼述志事人謂寫得襯切府君明於禮學蓋早襲家庭美訓知舊及親懿多質其疑難

嘗歎冠婚喪祭禮律浩汗人家所行各自不同擬述四禮要覽酌古通今叅以近齋禮說簡撮節文中要語爲家內永久遵述計且曰冠婚緩禮也條列無難先撮喪祭蓋於庚子春所始而喪止於開塋祭止於致齋旣屬半槩而竟寢疾未克成篇胷中草本可知蔚有範圍遂與大化而隨藏嗚呼冤矣



府君嘗詔不肖曰果川之祖考墓楊州之祖妣墓尙未祔葬實欠禮也先君在時每以此憂歎吾亦屢承教語而顧無吉兆因循于茲極爲痛迫且烽火峴親山地勢卑下難保其安人之動於風水說而屢遷墳墓者吾甚非之至若宅兆不利慮有災患則改葬可也在後昆宜爲念之

府君質雖清瘦氣則剛明每多愆和而能力焉儕友皆不以短造爲慮及病甚委淹床第而猶不廢洮頰之節晝則必加衣依枕緊捲衾具問疾者皆以爲平復有期竟至大故壽止四十五方其疾革而如平日

者豈非養性養氣之致乎

府君以辛丑十一月初一日丑時考終于薰陶坊竹廬洞第翌年壬寅正月初九日葬于楊州牧蘆原面烽火峴前洞寅坐之原

府君持心耿介飭躬恭儉存內發外粹然無雜夙蘊才器詞翰瞻敏爲士友所推許不幸屢屈公車而就蔭塗薄試郡邑而止竟未一展所抱論者歎惜嗚呼府君德行之高操守之正見識之明深論議之宏達人或有未之盡知者矣如不肖晚生而又早孤旣無萬一之詳蒙駭愚迷逮事之際又不能管蠡之測窺



畧舉晨昏過庭時一二見聞如右惟望立言之君子哀矜而採擇焉

先妣淑人杞溪俞氏行錄

先妣姓俞氏籍杞溪新羅阿殮三宰之後麗初有諱義臣自以新羅世臣守節不屈麗祖怒命降屬戶長由是仕宦不絕入我朝益大而昌有若景安公諱汝霖肅敏公諱絳官皆判書相繼爲名臣有諱省曾號愚谷官觀察使諱棍丙子抗疏斥虜和秉義森嚴時議壯之亦官觀察使再贈至左贊成諡忠簡號鳳洲諱命賚出入尤翁門下以道義自任拜四山監

役不就 贈吏判號慈教堂是於先妣爲七世六世及五世祖也高祖諱廣基進士官知中樞府事曾祖諱彥銓進士 贈司僕正无子取伯氏都正公諱彥鐸之仲子諱漢葛爲后生員官通政大夫 贈吏曹叅議考諱民柱飭躬砥行杜門而終以孫致善貴再贈至吏曹叅判妣 贈貞夫人宜寧南氏縣監諱紀雲之女監役諱直寬之孫逸執義號東岡諱彥經之八世孫柔靜端淑克著徽範先妣以 正宗二十年丙辰九月十三日乙卯亥時生于漢師龍洞第稟性貞淑寬厚儀度豐盈端重外無修飾內執清介孝友



根天自幼已然在父母側敬畏居先未嘗喧笑嬉媠有飲食不命不敢食有教訓恭恪聽受不待更飭居三甥一妹之間因心篤友未見有拂忤意及稍長持身尤謹深處閨中終日不窺戶凡女紅諸事靡不嫻熟精敏年十五庚午冬歸于先府君先是我祖考晚有一子必欲擇佳配外王父叅判公於我家有戚誼聞其內行淳備意其子女賢遂使聘之時祖考宰延安至翌年辛未夏行于禮于府衙舅姑見而喜曰果法家女也暫留旋歸至壬申春祖考解任家居先妣始還侍極其誠敬屢世宗饋助祖妣承祭豆籩供具

手親洗濯務致蠲潔備盡誠禮亦不敢專惟姑命是順祖考嘗抱貞疾先考既無兄弟旨甘之供藥餌之節與先妣共之先妣晝宵洞屬服勤靡懈祖考性本簡潔凡執事者鮮適其意惟先妣先意承之祖考大嘉賞之曰是婦也能使我忘其疾病之苦賢矣哉癸酉祖考又拜瑞興府使挈眷赴衙而先妣因事未得往侍乙亥春祖考患疹竟於二月捐世于任所先妣以未克終孝爲歿身慟哀毀踰禮曰將於何地仰報至恩乎五月又遭外王父喪先妣哭之慟曰余之罪惡上通于天四朔之內荐遭親舅家禍故何以生爲



荷春遺稿 卷三  
時偏慈在堂難於離闈時時往省以敘戀慕之忱至辛巳秋以輪泄棄世先妣攀擗過度哀瘁成祟旋添輪症幾危僅甦事祖妣如事祖考每侍側飭衣整容周旋中禮祖妣金淑人性嚴峻或有不豫色益小心起敬見其意解然後退淑人終乃心嘉之事先君子主於順而無違家內諸事靡有巨細必稟而後行或有過差時進箴規補益甚多亦以謙慎自居未或預聞外事每以婦女專輒者爲戒先府君亦敬待如賓久而不衰府君或與士友會先妣具食而餉物芳器精割肉必正客退而歎美有庶祖母接之以和遜未

嘗一失色辭庶祖母亦愛敬之以至于宗黨隣里皆推以誠信厚誼藹然遠近無不悅服如有告急雖明日用者輒罄而與之寒者而解衣之飢者而推食之惻怛之意溢於辭表或未及施焉則竟日不樂御臧獲嚴而有恩均其賜與不偏勞佚有過則諭以事理使之自新未嘗輕加責罰曰此亦人子也人或以楊萬里家範比之先妣生三男五女而六皆早夭只有不肖甥妹顧復撫育靡極不至而義方之訓亦未嘗奪愛而少弛子以不妄交遊爲先女以多言取憎爲戒諄諄詔諭之不肖羸弱善病保護憂慮暫不忘置



如有過失切責不假日汝家本以詩禮相傳豈可忝  
墜乎我妹氏貞惠明淑固不待父母訓導之勤自能  
超悟亦猶提誨不倦及其笄也舅家咸稱之曰是得  
孺染告誡之力耳慈愛子婦如親女有飲食則雖少  
必分與之有疾病則憂慮曲問之不已子婦生產者  
屢而皆不能舉只有一子先妣每對不肖而憂歎曰  
汝家甚爲孤子是婦也容貌德性宜繁嗣育而如是  
甚可怪也愛孫如子遇物之誨常在於修身篤行見  
其小成未幾又大闡嘉悅不置曰寒素之門慶莫大  
焉而立身事君責負益重汝其勉旃嗚呼自罹辛丑

崩城之慟已無意於世而庚申見妹氏金婦之憾辛  
酉又見子婦喪變哀楚痛疚若不自堪少患風痰喪  
威之餘榮衛內鑠輾轉添徂遂於 當宁七年庚午  
五月十七日壬午卒壽七十五用是年七月二十二  
日權安于廣州儀谷面葛山上洞負乙之原一男一  
女男齊近不肖生員前郡守女適金元性文科今承  
旨齊近男定陽生員文科歷翰林檢詳今應教金元  
性有三女長適李範翊進士次適俞鎮學文科今注  
書季適洪淳珏嗚呼先妣姿稟柔貞慈惠孝而且友  
卽其天性也旣失怙恃終身哀慕每當喪餘飲泣不



已連哭同氣四人久而益悲曰割半之痛何以理遣  
寔余命窮之致也至行如此故事舅姑如父母處同  
堂以誠心務得其歡平日端居簡言語飭威儀外若  
莊肅而內實和平及夫接待推施如恐不及口不出  
戲言心不萌忮意未或有逾詐而爲智違道而干譽  
凡矜誇爭競之習一切斥如也志又高潔以乞貸爲  
恥雖至親間亦罕及焉或不獲已則中心不樂尤嚴  
於辭受先府君屢典州郡初邑則先妣隨往而雖尺  
帛斤肉之微未嘗擅用或有夤緣賂物干囑者則必  
牢拒之曰恐累夫子清德也未或動心於得喪欣憾

先考自居昌解龜久未甄復家人甚悶之先妣曰仕  
宦有數悶然何益不肖十六小成至近四旬而未筮  
仕或有吁嗟語則先妣輒曰自有其時屢赴日次  
殿講竟不中先妣不悅曰士子持身無異處女登  
筵應講舌爭不利覲然而退曷若不赴之爲清快也  
修行勅躬不墜家聲是爲後昆之責至於科名猶屬  
餘事但願汝之有令名不願苟求祿利也其委分任  
名類如此不肖晚忝蔭塗再纏郡紱餼廩豐饒皆就  
養焉而惟務節儉食不兼珍衣不御錦遇人必問其  
政治得失以爲憂喜恒勉勵之曰責重分憂不可斯



須放忽也嗚呼歸于我先君子三十餘載梱政大小  
斬斬有節咸得其宜祖考既捐背先考又家食勢甚  
窘窶先妣黽勉有無雖鬻簪典裳縫澣及時不以憂  
先考心雅不喜芬華衣弊不耻視世之高髻美服如  
不屑焉先考數年沉痾知其必無幸每於夜間攢手  
禱天請以身代及喪之日晝哭幾絕曰卽欲下從而  
但爲弱子未也時祖妣年高恐貽重憾哀容必改於  
晨昏之謁婉愉寬抑兩頰常有涕淚痕祖妣下世後  
禮當代莅中饋而使子婦幹蠱曰吾病且衰况是婦  
才能優爲冢婦之任乎盖亦出於謙挹也噫先妣淑

哲之性孝悌之行之仁之德旣深且厚以至於一言  
一動動合閨範求諸世之良媛實尠其儔嗚呼不肖  
早服懿訓受賜弘多若泯滅其貞靜含章之德美則  
不孝之罪於是乎益大用是懼焉遂投血畧舉侍闈  
間所覩記而稟賦昏慵文辭短拙不能闡揚其萬一  
俯仰穹壤此慟此恨靡有攸居然亦不敢一辭夸溢  
恐傷平昔執謙之意惟撫實書之以乞文於立論之  
君子伏願哀其志而惠之銘焉



敬菴遺稿卷之三

敬菴遺稿卷之四目錄

附錄

祭文 二

家狀

墓誌銘

墓表

年譜



敬菴遺稿卷之四目錄

敬菴遺稿卷之四

附錄

祭文

尚州營將金禎根

維歲次乙酉三月庚子朔十四日癸丑本州鎮營將兼討捕使金禎根謹以菲薄之奠告訣于通訓大夫尚州牧使朴公靈帷之前曰惟公淑德詩禮素服簡雅其望恭儉且肅蔭顯三品治著八州矧茲兩衙相距一堠接人有量藹其和平半載承誨公退頻迎何意奄忽便成千古撫枕驚呼欲起還仆卿月蒼黃千里戴星故山迢遞露濕丹旌有淚盈斛奉詞塞咽執



紼長號陳酌敬薦嗚呼哀哉伏惟尚饗

祭文

叅判金元性

維歲丁亥二月己未朔十二日庚午清風金元性病伏床茵未能躬造具隻鷄奠綴數行文遣舍弟晚性謹告于故牧使敬菴朴公靈筵之前曰嗚呼今世君子惟公是耳承近翁詩禮遺訓孝友根於性睦嫻由於情誠信勤飭見重於士友天之所賦於公者可謂厚矣而胡爲官不稱德壽未及耄而止歟嗚呼以公蘊抱宜其展施廊廟之上而晚就蔭路歷典州郡竟至客館臯復闔境悲號天可謔歟所到七邑茂績紀

于石遺澤溢於謠豈可以此而試公才德之萬一云耶嗚呼賢器位躋宰輔聲望有蔚榮孝備摯已是公享受者而賢抱繼又大闡妙年令譽將期遠到此乃公碩果之報垂於無窮而未艾者也公若有知想必悅豫於冥冥之中矣嗚呼顧予不佞委禽高門已五十年矣令妹氏棄世亦垂三十年矣而公之眷契不替余之資益愈多苑枯焉相關欣戚焉與共切惻麗澤所以依賴於公者深且切矣豈意一朝遽成千古嗚呼悲夫余亦老白首矣尙厠朝端無一涓效退寓樵牧之鄉世慮灰冷惟以訓養幼累爲餘生滋况而



荷者遺和 卷四  
洛行間濶操文洩哀尙稽于今撫念往昔孤負實多  
於焉墓草再宿筵几將撤今纔一觴來侑滿臆悲緒  
惟有涕淚之如迸而已靈其不昧庶垂歆諒嗚呼哀  
哉尙饗

家狀

男定陽

今上二十二年我先府君以尙州牧使卒於官不肖  
時官都承旨聞病疾馳赴入境已無及矣叫號隕絕  
尙忍言哉嗚呼府君血肉惟煢然不肖已奔走宦途  
二十有餘年於國無絲毫補親老而不歸養遂不得  
一訣終天慟恨萬殞難贖天乎天乎府君平生立身

居官言行滿人耳目不肖幼少莫之省長又離違不  
得詳然已不能詳於家庭而欲恃人耳目以久於後  
世不亦難歟久而遂泯不肖之罪不尤重歟乃敢僅  
述所覩記如左府君諱齊近字淑道號敬菴姓朴氏  
貫潘南麗季有諱尙衷官右文館直提學世稱潘南  
先生以道義之學至我 肅廟朝追諡文正生諱崱  
佐我 太宗位至左議政封錦川府院君諡平度勲  
業俱載國乘五傳至諱紹官舍人 贈領議政諡文  
康號冶川道學爲己卯諸賢所推重自是厥後世襲  
簪組四傳至諱世城 顯宗朝左副承旨己亥訟禮



斥尹善道權認下理幾危生諱泰遠官牧使 贈吏曹參判三傳至諱胤源官假監役 贈吏曹判書兼祭酒諡文獻號近齋以道學爲一世士林之宗卽府君曾祖也祖諱宗輿府使 贈司僕寺正考諱雲壽官府使 贈吏曹參議妣 贈淑夫人杞溪俞氏 贈吏曹參判諱民柱女觀察使諡忠簡諱槐之后也府君以 純祖己卯三月二十五日寅時生于漢師養生坊倉洞之寓舍甲午進士 哲宗乙卯九月徽慶園遷奉時差宗戚執事付副司勇陞副司果庚申拜通禮院引儀移漢城府主簿十二月都政拜刑

曹佐郎判堂以府君公明凡遇眩遽必屬府君查決辛酉陞正郎壬戌正月轉 景慕宮令移 永禧殿令三月因 親行酌獻禮蒙陞敘五月拜江西縣令今 上丙寅正月 特教換載寧郡守己巳秋有旨換光陽縣監以親老辭免十月戶曹判書金公炳國辟爲正郎卽別例房也庚午五月丁俞夫人憂服闋之翌年癸酉正月除司饗院僉正甲戌移廣興倉令乙亥八月拜江華府判官丙子二月移拜金川郡守丁丑十一月拜全州判官以 特教擇差也庚辰六月以 肇慶廟 慶基殿修改勞陞敘辛巳七月



敬齋遺稿 卷四  
換海州判官癸未八月換茂朱府使甲申六月移拜  
尙州牧使乙酉三月初二日戌時考終于任所壽六  
十有七 贈吏曹叅判別職如例以不肖階亞卿而  
施 勲典也以其月朔歸于龍仁水真面棲鳳洞丙  
舍用是年四月十六日葬于本洞子坐之原與先妣  
墓合窆也配 贈貞夫人韓山李氏學生諱應在之  
女府使諱義贊之孫賢淑有古哲媛德事夫子甚謹  
已卯十月十二日生辛酉七月三十日卒初葬于廣  
州旺倫面五馬洞會祖妣 贈貞夫人安東金氏墓  
階下乙丑十一月移葬與府君墓同兆而耐左有一

男不肖定陽今叅判娶郡守趙秉璋女生一男三女  
男勝吉一女適進士鄭雲哲二女適李文魯三女幼  
先是俞夫人夢庭中桃樹一枝數實爛然仍有娠而  
生府君府君生而聰敏顏貌秀潔稟性端粹自孩提  
時舉止雍容笑語安詳與凡兒異自九歲以後叅議  
公宰外鮮家居府君幹務若老成人稍長力學不怠  
年十六登庠舍甫弱冠慨然志于學往拜梅山洪先  
生先生卽近齋公高足也府君出入其門講論性理  
之說以誠敬爲存養之本雖冠婚喪祭節文之小者  
未嘗一毫放過必書以質疑故所見益高所進益大



秉志焉極其耿介持身焉極其莊嚴動靜云爲準以繩尺奉先事親主於孝敬待人接物一於和平謹而拙簡而嚴臨事周密不以微細而或忽處世恬澹不以聲援而或屈日必晨起整襟危坐非甚病不廢巾櫛所讀必聖賢書稗官小記一不留眼筆畫古真無一點放過御家有法閨門之內斬斬焉夫婦相對敬之如賓教子弟嚴而有義交朋友久而愈敬不以邊幅相飾凡於居官之際雖素所親昵之吏胥亦不冠不見自奉菲薄衣服必儉而潔飲食必約而精處窮困而不生躁競之心在繁華而不失儒素之態人有

哀慶若已有之人有疾病若已憂之故宗族皆曰吾宗中可以托妻子者惟某一人已矣少時肌膚清瑩甫四旬齒牙漸脫未六旬盡落如耆老而氣度內強心神精旺動作接應有少壯難及處嘗曰以吾弱稟老猶少病者慎攝故爾亦可見自修之一端此府君學術之正性度之嚴得於內而著於外者也若其誠孝出自根性往在辛丑以弱齡丁叅議公憂初終葬祭一遵家禮非時見于祖妣與母夫人不踰內闕盛暑不脫衰絰朝晡哀哭傍人爲之感泣其事祖妣如叅議公之事之洞屬誠敬罔敢少懈藥餌食飲必手



自調和不委他人夫人嘗曰某吾孝孫也已西服承  
重居喪執禮一如辛丑庚午遭俞夫人喪執禮如已  
酉雖祁寒盛暑月必省楸三年靡懈三世墳塋積誠  
數十載求吉兆必遷乃已並具石儀築丙舍遍省先  
墓不以代遠或間不以路遠或廢俱置祭田及錢貨  
以備墓下不時之用文化縣有叅議公遺愛碑亦建  
閣買田屬之民俾守護家廟日必晨謁每遇忌辰恪  
謹致齋不解衣帶皇皇如不逮至旁親家亦必叅祭  
先世文獻莫不蒐輯藏弄有一妹適金氏出門必訪  
不以枉路或廢三十年如一日推至宗族顧恤無遠

近貧乏有周婚喪有助往往傾橐不難姻親之喪必  
操文而祭會下而哭曰友朋之間猶爲九原之慟况  
在至親乎其宰州郡也族戚知舊之謫居島中或省  
內者輒爲之助饋使不至窮蹙此府君孝友嫻睦之  
過於人者也若其政事其在江西也俗強民蠢乃設  
鄉飲之禮士勉篤學民尚敦俗四載之間文風蔚興  
還逋之虛留至十三萬石之多官隸幾渙散矯抹補  
苴巨瘼遂完縣人立碑紀績曰務先興學惠多革弊  
其在載寧也御史有褒曰邑還之逋藪查充猾胥亦  
感山城之軍物修繕暴客可禦其在度支郎也時有



敬者遺和卷四  
太廟修理之役課日赴公恪勤不懈本曹及各倉錢  
布之納請囑公行其弊甚久府君一以清白自律人  
不敢干以私其在沁判也治績益著至丙子春日本  
兵船猝泊於草芝津砲聲轟天人皆股慄府君不爲  
動躬往彼船問情致犒處之安閒人民之恐懼欲離  
散者曉諭撫摩俾各安堵時大官申櫜副官尹滋承  
奉命來留講定條約時日頗久而彼我接待之際  
務盡誠意各得歡心雖異邦人亦皆稱感其在金川  
也邑處孔路每於公私之行流馬爲弊有石灰之產  
京司責應浩多又有還穀捧留於松營山城者民病

遠輸報于巡營轉稟籌司並皆釐正吏民立碑建閣  
紀以實績送稅錢數千緡至坡州失於賊而商販之  
錢亦與焉及天明搜得於川邊先是稅錢緡以麻繩  
辨而索之人皆服其明其在全州也纔經大歉重以  
前官罷於御史民饑吏困公納多滯簿書訟牒委積  
如山府君手題耳聽口授心劃冤枉者得伸強禦者  
思戢未及半載事皆就緒府內有威鳳山城素稱形  
勝而積久不修椽傾堞圯府君慨然歎曰國家之置  
守宰蓋欲舉廢興替也况城郭爲保障之先務乎乃  
不費民力而修葺且曰堤堰者所以浚溉資農也軍



器者所以敲敕禦暴也而今流者壅淤精者剗鈍亦豈非守土之責歟乃浚其壅礪其鈍積廢俱興左右道直指迭相褒 啓巡使李敦相亦爲之題曰衆瘼洞革一府改觀可以見公議之藹蔚矣先是 上之七年 命曾經道臣者以其時守令治績之最各薦幾人前黃海監司曹錫輿以府君應至是又 命政府有司堂上及九卿諸道臣各舉如前政府有司堂上李埉禮曹判書尹滋承全羅監司沈履澤並以府君應乃者全州居前正言李琪永疏言本邑戊寅結歛至爲數十餘萬兩而上納僅三四萬兩宰伯之臣

貪利虐民云云伯指監司宰指本府也自政府覈之一切無可證乃竄李琪永施以誣人律府君自引辭欲去政府草記曰橫罹疏論而蓋其本事明白落空則更有何可引之情勢乎春務方殷請使之不日下送 上允之府君不獲已復赴尙是嶠南大州也歉荒荐經事務冗繁愆納以鉅萬計府君勵精爲治克勤克儉不遑暇豫往往坐而達曙日仄乃食至於城堞廨宇亦多修整庶幾百廢俱興未及半載遽至捐館嗚呼痛哉府君少強健鮮疾病居官數十年稍示億損家人子弟或諫其衰年不宜過勞精力願稍自



荀者遺和 卷四  
養府君歎曰我自不知其爲疲也且我雖欲自便奈  
公事多滯何前後居官非甚病未嘗一日不坐衙如  
朔望賀禮及社稷文廟厲壇大小諸祀必躬之不使  
人攝凡有公幹事至卽行不淹時刻題判必親筆公  
納必親檢尤致意於聽訟非對質不決束吏尤嚴粒  
米半鈔吏不敢私故終府君去吏無以逋得罪者此  
政令施措之宜也嗚呼不肖愚魯不克負荷府君以  
是憂懼督課誨諭不以不才棄嘗戒曰人有不學而  
能立身者乎懶散而能做事者乎又曰人家後昆之  
昌必由其先之蔭德德之施自宗族始勿較遠近力

所及處可以盡心仗助此非但爲爲人之事卽盡在  
我之道也越在丙寅不肖濫竊科第府君戒之曰汝  
尤飭躬勉學從賢師友持身必謹慎修行必正直體  
吾家儒素之操勿或躁進繼祖先忠孝之心毋忝所  
生每遷一官輒戒如初常憂服用或侈章服鞍馬必  
自檢視曰勿效新進俗輩壞吾家法甲戌不肖以嶺  
左繡衣奉 命將發府君面飭曰嶺大省也人心尤  
異奸吏或畏守令之嚴明多以飛語中人少不審慎  
鮮不中其毒矣書 啓褒貶或失其實其人去就勿  
論烏在其告 君以實之道乎且罪疑惟輕古聖攸



戒汝其勉旃不肖奉以周旋幸免大何及至已卯不  
肖陞嘉善階漸致清要府君勸戒曰汝以駑下未及  
強仕猥承 寵渥堯攬美職汝以爲榮乎吾每聞輒  
驚回榮爲懼寢食靡安嗚呼以不肖之愚蒙保有今  
日皆府君提撕之賜也從茲以往其將誰怙蒼天蒼  
天此何人斯嗚呼以府君之懿行曠度苟得其位宜  
可以彌綸 王室裨益世程而晚就蔭途未究其用  
且府君綰符在外數十年嘉績善行不肖莫能盡其  
詳今畧綴往時過庭之訓以寓風樹之感若其正大  
之志簡古之操儉約之德不能彷彿其萬一尤增罔

極之痛凡子弟述父兄之賢何患不能詳詳而或濫  
君子譏之然論者往往失之平易君子又懼或不能  
詳夫狀之爲言狀也以文形狀其德行也不肖旣不  
文欲詳而未能濫於何有止得其梗槩而已伏惟立  
言之君子垂仁財察寵以一言之重不勝泣血祈懇  
之至

墓誌銘

并序

大提學金尙鉉

尙鉉少與敬菴朴公爲友在竹巷寒泉之間閉閣相  
接公閒居潛修足跡罕出阡陌而於余猶未嘗時月  
不相見見輒澹然寡言笑不一論人過失以禮律身



不越乎法家規度既而作宰西南殆二十年賢聲聞於朝每入都必叩余之門蓋公於交友久而猶不忘也今 上二十二年乙酉三月二日公竟卒于尙州官署享年六十有七既練嗣子定陽纍然衰服來訪田廬以余之忝爲先友謁幽堂之志嗚呼余耄矣疇昔朋舊凋謝殆盡公其一也俛仰人世已不勝後死之悲若年不副德位不稱器於公又有遺憾焉按狀公諱齊近字淑道潘南之朴冠冕東邦在 中廟之世議政府舍人 贈領議政諡文康諱紹道學爲己卯諸賢所推重世稱冶川先生在 顯廟之世左副

承旨諱世城斥尹善道權認禮訟之誤曾祖諱胤源假監役 贈吏曹判書兼成均館祭酒諡文獻士林稱近齋先生祖諱宗輿府使 贈司僕寺正考諱雲壽府使 贈吏曹叅議妣 贈淑夫人杞溪俞氏 贈吏曹叅判諱民柱女也公以 純祖己卯生夙遊於洪文敬公直弼聞居敬修身之學甲午中進士哲宗乙卯 徽慶園遷奉時差宗戚執事付副司勇陞副司果自是於內歷通禮院引儀漢城府主簿刑曹佐郎正郎 景慕宮令 永禧殿令戶曹正郎司饗院僉正廣興倉令於外拜江西縣令載寧郡守換



荷者通和 卷四  
光陽縣監以親老辭免江華府判官金川郡守全州判官海州判官茂朱府使尙州牧使其在江西設鄉飲酒禮以興士風還穀虛逋十三萬石揀瘠而完在載寧政如江西在江華丙子春日本兵船泊於草芝津砲聲轟天公不動色躬往其船問情致犒民之驚散者曉諭撫輯在金川還穀之留松都山城者民病遠輸報察司籌司而釐正之稅錢幾千緡失於坡州賊而商錢亦雜焉及搜得於川邊稅錢則用麻繩纏之故其索也易辨人服其明在全州繕山城淪水利除戎器全州人李琪永以徵歛之濫疏論監司判官

琪永竟被誣人律以竄而公猶引義力辭政府請不日趣還任尙之繁雄冠於嶺南公納積滯累巨萬公心籌手判夙宵殫精事潰于成而已示憊公竟以勞於字牧而終矣公事親奉先一出於誠居父母大母喪哀經不去身課月省阡三世墳墓求吉地安厝具石儀築丙舍置祭田晨謁家廟忌辰致齋罔或少懈至旁親家亦助裸也揀族戚傾橐而不吝姻黨有喪必操文而祭曰友朋之間猶爲九原之慟矧伊至親乎墓在龍仁水真鄉棲鳳洞配 贈貞夫人韓山李氏士人應在女事夫子甚謹祔公墓子男定陽前任



吏曹參判用其貴 贈公如其官有一男三女男勝  
吉一女適鄭雲哲二女適李文魯三女幼銘曰  
昔文獻先生研精禮學卓有功於儒門今公行爲端  
士治爲循吏繫惟文獻先生之肖孫

墓表

大提學金永壽

我東望族必拇指潘南之朴以代以經術濟官業法  
家忠恪孝悌之行有可以惇風俗扶世教耳言出而  
爲民信事行而爲世法動容而爲民之表古所稱君  
子人近故敬菴公是也公諱齊近字淑道敬菴自號  
也姓朴氏貫潘南肇自麗朝簪組蟬赫有諱尙衷右

文直提學以道義之學至我 肅廟追諡文正生諱  
嘗我 太宗朝左議政錦川府院君諡平度五傳而  
諱紹舍人 贈領議政諡文康號冶川道學爲已卯  
諸賢推重四傳而諱世城承旨已亥禮訟斥尹善道  
權認四傳而諱胤源假監役 贈吏曹判書成均館  
祭酒諡文獻號近齋經學爲士林之宗寔公會祖也  
祖諱宗輿府使 贈司憲府大司憲成均館祭酒以  
純學正道聞于朝考諱雲壽府使 贈吏曹判書妣  
贈貞夫人杞溪俞氏 贈吏曹參判諱民柱之女也  
公以 純祖已卯三月二十五日生甲午進士 哲



宗乙卯 徽慶園遷奉時差宗戚執事付副司勇陞  
副司果庚申拜通禮院引儀漢城府主簿刑曹佐郎  
正郎壬戌 景慕宮令 永禧殿令江西縣令今  
上丙寅載寧郡守己巳光陽縣監以親老辭拜戶曹  
正郎癸酉司饗院僉正甲戌廣興倉令乙亥江華府  
判官丙子金川郡守丁丑全州判官辛巳海州判官  
癸未茂朱府使甲申尙州牧使是公內外職踐履也  
乙酉三月二日公考終于尙州官廨享年六十有七  
嗚呼公顏宇秀潔稟性粹正自幼時寡言笑端容止  
及長遊梅山洪文敬公之門講劇性理律身立志一

於禮義皆由學問中出來而孝又其天性也辛丑丁  
判書公憂雖盛暑不脫經帶事祖妣與母夫人一心  
誠敬祖妣嘗曰某吾孝孫也已酉承重祖妣喪持制  
愈謹庚午遭俞夫人喪公向衰疏食亦如禮三世墓  
具石儀置祭田盡誠先事罔或少懈有一妹適金氏  
起居疾病躬視篤摯三十年如一日雖疎姻戚緩急  
告公竭橐而不之計族親有喪必操文而祭曰友朋  
尙爾矧至親乎此皆公孝友嫻睦之人所難及也在  
江西勸學興士有文翁化還逋十三萬石矯弊而邑  
完在載寧剔奸如神持斧褒 啓丙子春在江華日



本兵船泊草芝津砲聲轟天公單騎往問情撫循軍民整暇以鎮之羣心恃以爲安在金川孔路流馬之弊及松營城餉遠輸之勞報察司籌司釐正稅錢數千緡被竊于途公以其錢已貫麻繩而跡之果獲同日過商之錢亦皆追索人服其明在全州未半載而修城堞繕戎器濬水利並不煩民力直指褒啓道臣登剡全州人李琪永疏論監司判官濫徵按驗被誣律而公乃引義政府促還焉尙州局鉅弊痼公納愆滯累鉅萬公設方畧將就緒而公捐館尙民至今墮淚言公往日剗理之勤瘁是公內修外治之槩見

者也乙酉四月十二日葬于龍仁水真面棲鳳洞子坐原 贈議政府左贊成用哲嗣貴追 恩如例配贈貞敬夫人韓山李氏學生應在之女貞仁淑哲有古女士閨範已卯十月十二日生辛酉七月三十日卒祔公墓左嗣定陽文科今總理大臣生一男二女男勝吉文科承旨女適鄭雲哲今翊衛次適李文魯嗚呼公學術精詣理識綜博士友期詡者深而乃局於蔭塗未克展布吁可慨爾若公內行醇備而有遺愛於嶺湖列郡豈所謂惟孝友于家庭克施有政者非耶嗇于身則厚其報理也公之子姓宜其益熾而



昌矣余先伯氏與公最相知嘗語余曰敬菴之通才高識吾畏友也余以未得摳衣承誨為恨今其嗣大臣公囑余以表隧之文余樂為之不敢以固陋辭謹撮其大較纂次如右

年譜

男定陽

公姓朴諱齊近字淑道潘南人號敬菴

己卯純祖大王十九年三月二十五日戊寅時生于漢城西

部養生坊倉洞寓第先時母夫人俞氏夢庭中桃樹一枝數實爛然獨存自此

有娠

壬午公四歲考順興公差宗戚執事因綏嬪朴氏薨逝而為五寸姪也

丙戌公八歲六月考順興公拜禮山縣監尋換文化縣

令○九月陪祖妣先妣觀文衙

丁亥公九歲八月陪祖妣先妣還京第

癸巳公十五歲五月行冠禮○十月聘夫人韓山李氏學生

應在女

甲午公十六歲二月叅式年監試初試一所終場○三月叅覆

試三等第五人○四月應生進放榜 特命賜樂

○九月陪考順興公榮掃于楊州祝石嶺及烽火

峴先塋

丙申憲宗大王二十二年公十八歲四月往省果川雲滿里先塋○



十月取家藏篋筒中先世遺墨自六代祖考松潭公至祖考瑞興公

五世遺墨又以考順興公手筆作帖○真十六册諺二册作帖序其篇首

丁酉公十歲四月往玄湖拜梅山洪先生直弼曾祖近齋先生

人門

戊戌公二歲二月與三從弟齊元讀書于終南山下挹

白堂三月撤還○生女三歲夭

辛丑公三歲正月差太學掌議行公○十一月丁先

考順興公喪○十二月子定陽生

壬寅公四歲正月行先考襄禮于楊州烽火峴

乙巳公七歲正月人日製入格受 賞○日次 殿

講入格受 賞

丙午公八歲三月花製入格受 賞○十月生女旋夭

丁未公九歲六月 殿講入格受 賞○九月生男

旋夭○十月往拜梅山洪先生請先考墓誌

已酉公一歲二月丁祖妣金夫人喪○四月行祖妣

襄禮于楊州烽火峴○九月往平邱金谷拜省十

一代祖妣十代祖考山所

庚戌哲宗大王元年三月遷奉六代祖考妣位祧主

於家中別廟自再從季祖叅判公房當遷于次長房庶族會祖義源家而居在長淵家

勢甚貧故以義源改題旁註後權奉于宗家仍為攝祀



壬子公三十四歲七月操文往哭梅山洪先生○十一月

往叅外祖父母緬奉於長湍地

癸丑公三十五歲八月緬奉會祖妣金夫人于廣州五馬

洞自楊州祝石嶺移奉○十一月緬奉祖考瑞興公祖妣李

夫人祖妣金夫人先考順興公于廣州五馬洞自楊

州烽火峴移奉

甲寅公三十六歲二月建五馬洞丙舍○十月生女旋夭○

叅方外儒疏曹叅判錫雨刊行其高祖故叅議夏望文集而集有祭其師尹拯文侮辱

尤翁以楊墨申韓老佛等說遣辭甚悖故士論峻發方外館學凡八疏有文集毀板官爵追奪之命

乙卯公三十七歲二月叅慶科庭試文科初試於二所○

九月差宗戚執事因園遷奉徽慶○行兒子定陽冠禮

○十月陞六付副司果遷園都監堂郎別單啓下○十一月

子定陽聘婦楊州趙氏奉事秉璋女

丙辰公三十八歲二月叅丙科別試文科初試於二所○

四月往會再從仲祖文肅公緬禮於忠州轉省廣

州高大只里十六代祖平度公山所仍往墨坊里

拜洪梅山先生墓○九月母夫人周甲設宴識喜

丁巳公三十九歲四月哭洪公一純靈几於鷺湖歷拜肅

齋趙公秉息於旅所華藏寺



戊午公四十四歲五月遭外舅李公服有祭文○七月往會李

公葬於洪州歷至鴻巨里拜外姑南孺人墓○九

月秋到記叅給二分初試

己未公四十一歲七月秋到記發直赴初試

庚申公四十二歲七月遭舍妹服金正言元性夫人○有祭文○引儀

甄復○往會舍妹葬禮於長湍地○九月拜漢城

府主簿○十月遭季舅母貞夫人李氏服有祭文○

十二月移拜刑曹佐郎

辛酉公四十三歲六月陞拜本曹正郎○七月夫人李氏

卒有祭文○八月差迎接都監郎廳○九月葬夫人

于廣州五馬洞先塋○十一月卜側室金氏

壬戌公四十四歲正月移拜 景慕宮令○二月移拜

永禧殿令○三月蒙陞敘之本殿酌獻禮親行後 賞典

○五月拜江西縣令○七月對三政釐弊策○九

月奉板輿到衙

癸亥公四十五歲三月行鄉飲酒禮○四月奉還板輿于

京第

甲子當宁元年○公四十六歲十二月祇受會祖考文獻公節惠

之癸亥因領議政鄭元容所啓蒙 贈吏判施以易名之 典

乙丑公四十七歲八月承緘辭推考之以江西縣官屬流來還排 典



年條釐改事因廟堂  
回 啓至承緘推 ○十一月緬襄夫人于龍仁

棲鳳洞有祭文

丙寅公四十八歲 正月因 特教換拜載寧郡守○三月

子定陽叅慶科庭試文科榜○四月奉板輿到衙

○十月率子定陽往文化縣瞻拜先考善政碑載

寧後起閣以護  
○有上樑文

丁卯公四十九歲 二月奉還板輿于京第○三月建棲鳳

洞丙舍○往拜景賢書院○九月往拜石潭紹賢

書院栗谷先生安享之院

戊辰公五十歲 十月登繡衣褒 啓黃海道繡衣徐臣輔復命書 啓確實

上踏來尚質而不尚文芬華邊屏去從經而不從  
權邑還之逋藪查充猾胥亦感山城之軍物修繕  
暴客可禦西湖綠波尚涵千金之彈灾北邙白骨  
始伸百年之冤徵東吏尤嚴於空曠通材悉遵其  
率

已巳公五十一歲 六月因 傳教換拜光陽縣監以親病呈達

○十月戶曹正郎別例 甄復○差營建都監郎廳

庚午公五十二歲 正月叅守令別薦前海伯曹錫與薦 ○五月丁

先妣俞氏憂○庶子生二歲 ○七月行先妣葬禮

于廣州葛山○八月雲滿里山所暨五馬洞三位

山所石物排設

壬申公五十四歲 五月晨謁於家廟自十八日為始別廟則不行



癸酉公五十五歲正月司饗僉正甄復○二月子定陽陞

通政階以宿史官勞也○八月庶子生二歲

甲戌公五十六歲三月遷拜廣興倉令○七月遭外從兄

俞判書致善服以嶺伯卒于任所○九月往會俞

公葬於楊根

乙亥公五十七歲八月拜江華判官時有洋船來泊於境內故翌日辭陞

○九月異樣船退去防守兵解嚴○奉審麗王高

宗洪陵歸路歷拜忠烈祠○操文致奠于本府故

教官沈公暢之墓前日受學人

丙子公五十八歲正月日本國大臣黑田清隆副大臣井

上馨書記官宮本少一外務權大丞森山茂開拓

少判官安田定則來泊草芝津下陸我大官判府

事申櫛副官副摠管尹滋承奉 命下來設宴於

沁府公幹約條之時以地方官往來問情隨事接

應○庶子生三月○二月日使自草芝入府留住

數日收裝發船我大副官亦發行還京○往鼎足

山城奉審 璿源閣及史庫○哭副室金氏○三

月移拜金川郡守○建祝石嶺山所丙舍○新卜

側室昌原黃姓人

丁丑公五十九歲七月棲鳳洞山所石物排設○十一月



移拜全州判官前判官權用圭為繡衣魚允中封庫有令該曹勿拘常格各別擇差

傳教 ○十二月往魯城孝谷拜省九代祖考參奉

公山所

戊寅公六歲

四月登左道繡衣褒

啓

全羅左道暗行御史沈東臣書

啓誠心所推治規自成聽民訟而分析枉直有條有理督公納而較量輕重不煩不撓初政已驗於刷通邑瘼將蘇百事可推於捧稅民誦方蔚 ○六月登右道繡衣褒

啓

全羅右道暗行御史魚允中書

啓老成儀範循良模楷密察則錙銖無遺公明焉干囑不行

通帳就緒實由措劃之宜弊局向蘇多賴剗理之善徵督不煩於閭里民皆息肩署決靡懈於夙宵吏咸垂頭實績 ○八月操文哭奠于咸平守李公已著輿論可徵

用一於參禮驛旅邸

已卯

公六十一歲

三月遭繼外姑孺人韓氏服

有祭文

○閏

三月呈狀乞遞因政府草記承

嚴飭不日下送

之傳教

去月全州居前正言李琪永疏論本邑戊寅結戶歛之夥多至為數十餘萬兩

而上納則不過三四萬兩宰伯之臣亦貪其利率而虐民云批旨令廟堂稟處自政府關問該道監司沈履澤陳疏後查報上來李疏自歸構虛而廟堂覆啓李琪永施以永柔縣竄配事雖妥

帖以情勢之難安呈狀乞遞於吏曹矣廟堂啓日全州判官朴某間因橫遭疏論期欲圖遞而本

事明白脫空有何可引之情勢乎使 ○往會繼外之嚴飭不日下送何如傳日允

姑韓孺人葬禮於果川地

○九月省始祖墓於羅

州 ○十二月子定陽陞嘉善階



庚辰公六十正月受兩世 馳贈先考為吏曹叅議

祖考為司僕寺正定陽陞資 ○六月蒙陞敘之

典肇慶廟 慶基殿修改 ○被守令別薦因領議

應 後以地方官入別單 軍李 埉禮判尹滋承完伯沈履澤薦 ○七月庶女

天生 去年

辛巳公六十二月子定陽以日本國物情探知事承

命發行歷路來觀至八月 ○三月以治績有前完

伯沈履澤 筵奏 ○七月因 特教換拜海州判

官

癸未公六十二月重建五馬洞丙舍 ○呈辭單六度

而止巡相沈東臣觀燈于控海臺因本府舉行兵

該禱而來謝不 ○五月庶女生三歲 ○六月以全

州前判官登湖南繡褒四載為治一規廉平聽訟

稅也毫釐不差上納趁期均還而村無橫徵查陳

而結有祛瘼克推實心吏莫售於欺蔽不銜小惠

民自孚於字恤威 ○八月以 特教換拜茂朱府

甲申公六十四月發赤裳山城 璿源閣史庫奉審

之行次定兒板上韻懸揭安國寺辛未八月定陽

命曝曬於赤裳山史庫時有題詩於安國寺今於

十四年之後來莅此郡奉審到此見板韻心甚奇



乙酉公六十七歲二月建雲滿里丙舍○三月初二日戊

時考終于尚州牧任所○同月二十一日鞠還于

龍仁棲鳳洞丙舍○馳贈嘉善大夫吏曹叅判

兼職如例○以男定陽階亞卿而施馳典○四月十六日巳時葬于

龍仁縣水真面棲鳳洞子坐之原夫人李氏合祔

丙戌家狀成男定陽撰○墓誌銘成金太史尚鉉撰

已丑遺稿序文成韓太史章錫撰

辛卯贈資憲大夫吏曹判書兼職如例○以男定陽陸正卿而施馳

典

壬辰贈崇政大夫議政府左贊成兼職如例○以男定陽陸一品

而施馳典

癸巳墓表成金太史永壽撰

甲午年譜成男定陽撰

乙未遺稿刊印



敬菴遺稿卷之四



